

Suenter 40 onns danovamain a Cuira

Cuira: Festa federala da tir 2025

DA GION NUTEGN STGIER / ANR

■ **A la fin d'avrigl 2020 surdat l'Associaziun svizra da tir l'organisaziun da la Festa federala da tir 2025. Unic candidat per manar tras quella è Cuira. L'occurrenza duai avair lieu decentral e tratg vegn sin 18 stans en ina vischinanza da 40 minutas.** Il 2020 ha la 58avla Festa federala da tir lieu en il chantun Lucerna e quai cun Emmen sco center. L'occurrenza cumenza ils 12 da zercladur e cuzza in mais. Ils organisaturs quintan cun ina par-

ticipaziun da bunamain 40 000 tiradurs e tiraduras. Dapi in temp è er public che suenter la Svizra centrala vegn il Grischun, cun Cuira sco center da festa, ad organisar l'occurrenza da tir naziunala e quai il 2025. Las vistas che l'organisaziun da quel event da tir federal vegn surdada a Cuira èn bunas, cun esser quel lieu l'unica citad ch'ha interess da manar tras la Festa federala da tir 2025. Ina giada che la candidatura da Cuira è stada enconuschenta ha Payerne VD retratg sia candidatura a favur da la chapitala grischuna.

Il chantun e la citad da Cuira

Integrads èn quella candidatura èn er il chantun e la citad da Cuira. Ils documents inizials per ina candidatura ha il chantun retschet da l'Uniu grischuna dals tiradurs (BSV). Cuzunt quai che pertutga las investiziuns tar il stan da tir Rossboden a Cuira èn lura il chantun e cuzunt la citad da Cuira er pertutgads. Anc en il mais da december da quest onn quintan ils iniziants da la Festa federala da tir 2025 cun segns positivs dal chan-

tun, da la citad da Cuira e da las Uniuns reunidas da tir Cuira.

Fin tar la surdada

Ils iniziants speran sin bunas novitads dal chantun gist en connex cun las pussaivladads da promoziun davart dal concept chantunal per indrizs da sport (Kasak). En il decurs dal mais da schaner 2020 duai la candidatura daventar pli concreta ed esser pronta per inoltrar a l'Associaziun svizra da tir (SSV). Ils 25 d'avrigl 2020 tar la radunanza da delegads dal SSV a Payerne vegniss lura la candidatura grischuna surdada uffizialmain. A partir dal matg 2020 è previs da prender en maun l'organisaziun da la grond'occurrenza da tir cun vers 40 000 participants ed almain tants visitaders.

In'uniun purtadra

Per l'organisaziun da l'occurrenza da tir naziunala en sis onns è previs da fundar l'Uniu Festa federala da tir 2025-GR. A quella vegnan ad appartegnair las societads da tir che segnan per la realisaziun da l'event e ch'èn er las uniuns purtadras da la festa da tir naziunala. A Cuira vegn ad esser il center da festa e tratg vegniss sin auters 17 stans da tir davent da Maivilla fin Alvagni ed er en il Partenz. Per avair la capaciad èn necessarias 155 schibas per la distanza da 300 meters e 65 per las distanzas curtas. Ils organisaturs quintan cun in preventiv da radund 14 milliuns francs. Anc giascha la cumpetenza tar la Federaziun grischuna dal sport da tir e na enconuschents èn er betg ils num da las persunas che vegnan en dumonda per l'uffizi dal president u da presidenta dal comité d'organisaziun. Suenter 40 onns vegn Cuira danovamain ad esser il 2025 center da la Festa federala da tir, sco gia il 1985.



Il 2025 duai la Festa federala da tir avair lieu a Cuira e conturn.

FOTO G. N. STGIER